

Bil. 37

Isnin

26 November 2018



MALAYSIA

PENYATA RASMI PARLIMEN
Parliamentary Debates

KAMAR KHAS
Special Chamber

PARLIMEN KEEMPAT BELAS
PENGGAL PERTAMA
MESYUARAT KEDUA

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Penerokaan Tanah Secara Haram untuk Kegiatan
Pertanian di Kawasan Cameron Highlands**
- *YB. Dato' Sivarraajh Chandran (Cameron Highlands)* [Halaman 1]
- **Status Pembersihan Parit Jayus 4, Mukim 18 Sri Medan
Kawasan Parlimen Parit Sulong**
- *YB. Dato' Dr. Noraini Ahmad (Parit Sulong)* [Halaman 5]

**MALAYSIA
KAMAR KHAS
PARLIMEN KEEMPAT BELAS
PENGKAL PERTAMA
MESYUARAT KEDUA**

Isnin, 26 November 2018

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Isu Penerokaan Tanah Secara Haram untuk Kegiatan Pertanian
di Kawasan Parlimen Cameron Highlands**

2.37 ptg.

Dato' Sivarraajh Chandran [Cameron Highlands]: Terima kasih Tuan Yang di-Pertua. Saya ingin membangkitkan isu penerokaan tanah secara haram untuk kegiatan pertanian di kawasan Parlimen Cameron Highlands dan di DUN Tanah Rata, Pahang. Isu setempat yang saya bangkitkan ini berhubung kait dengan keselamatan penduduk dan kemenjadian pembangunan sosioekonomi masyarakat Cameron Highlands.

Tuan Yang di-Pertua, untuk makluman, terdapat hampir 60 lokasi di Cameron Highlands yang kini dikategorikan sebagai kawasan berisiko tinggi untuk hakisan tanah dan daripada keseluruhan jumlah tersebut, hampir lapan lokasi terdedah kepada risiko yang amat tinggi dalam masa terdekat. Jika dikaji secara teliti, kegiatan penerokaan tanah secara haram ini berlaku secara berleluasa dengan kebanyakan pendatang tanpa izin yang digunakan sebagai pekerja upahan murah untuk melakukan kerja-kerja penerokaan tanah secara haram.

Kebanyakan pendatang asing tanpa izin dalam sektor pertanian haram ini bukan sahaja menyebabkan masalah-masalah alam sekitar seperti hakisan tanah dan pencemaran malah turut menyumbang kepada pelbagai masalah sosioekonomi.

Menyedari situasi ini, saya berpandangan bahawa wujud suatu keperluan yang mendesak untuk meningkatkan penguatkuasaan undang-undang secara lebih komprehensif untuk menangani masalah ini.

Tuan Yang di-Pertua, justeru, saya ingin kerajaan menyatakan pendirian serta rancangan untuk menangani masalah ini. Jika kerajaan bersetuju, mohon dinyatakan secara terperinci, bilakah usaha ini akan mula dilaksanakan dan apakah mekanisme yang akan digunakan? Sekian sahaja. Terima kasih saya ucapkan kepada Tuan Yang di-Pertua dan Yang Berhormat Menteri dan Timbalan Menteri. Sekian, terima kasih.

2.36 ptg.

Timbalan Menteri di Jabatan Perdana Menteri [Tuan Mohamed Hanipa bin Maidin]: Terima kasih Tuan Yang di-Pertua, terima kasih kepada Yang Berhormat Cameron Highlands. Tuan Yang di-Pertua, Operasi Gading (Ops Gading) merupakan suatu operasi khas secara bersepadu di Cameron Highlands, Pahang yang diterajui oleh Majlis Keselamatan Negara, Jabatan Perdana Menteri (MKN, JPM) bersama agensi-agensi penguatkuasaan persekutuan dan negeri. Operasi ini telah dilaksanakan sejak Disember 2014 bagi membanteras masalah penerokaan dan pencerobohan tanah kerajaan secara haram dan membasmi pendatang asing tanpa izin (PATI) di daerah tersebut.

Kesan daripada penerokaan tanah bagi pertanian secara haram ini, kejadian tanah runtuh dan banjir lumpur sering berlaku di Cameron Highlands. Bencana ini bukan sahaja merosakkan harta benda penduduk, malah menyebabkan kehilangan nyawa. Misalnya, tragedi banjir dan tanah runtuh yang berlaku pada 5 November 2014 di Cameron Highlands telah mengakibatkan lima nyawa terkorban.

Ekoran daripada tragedi ini, beberapa siri mesyuarat yang dipengerusikan secara bersama oleh mantan Yang Amat Berhormat Timbalan Perdana Menteri dan mantan Yang Amat Berhormat Menteri Besar Pahang telah memutuskan supaya satu operasi khas secara bersepadu yang dinamakan Ops Gading dilaksanakan. Tuan Yang di-Pertua, dalam operasi ini, MKN, JPM bersama-sama agensi berkaitan membuat tindakan menahan pendatang tanpa izin, meroboh penempatan dan penanaman tidak sah serta mengambil tindakan terhadap pengusaha tanah secara haram di Cameron Highlands.

Ops Gading I ini telah dilaksanakan pada bulan Disember 2014 dan tamat pada Disember 2015. Dalam operasi ini, seluas 5,580 ekar tanah yang telah diceroboh dan diusahakan secara haram telah berjaya dikenal pasti dan daripada jumlah tersebut 4,675 ekar bersamaan dengan 83.78 peratus telah berjaya diambil tindakan penguatkuasaan.

Ops Gading I telah dilanjutkan menjadi Ops Gading II oleh Mesyuarat Jawatankuasa Tindakan Bersama Pemulihan Cameron Highlands Bil.1/2016 yang dipengerusikan secara

bersama dengan mantan Yang Amat Berhormat Timbalan Perdana Menteri dan mantan Yang Amat Berhormat Menteri Besar Pahang pada 12 April 2016.

Selain daripada membuat pemantauan terhadap tanah-tanah yang telah diambil tindakan penguatkuasaan, tindakan penguatkuasaan Ops Gading II juga telah memberi perhatian kepada usaha untuk:

- (i) memastikan tiada pencerobohan tanah-tanah baharu;
- (ii) membebaskan Cameron Highlands daripada kehadiran pendatang tanpa izin; serta
- (iii) melestarikan Cameron Highlands sebagai salah satu destinasi pelancongan utama di Malaysia.

Ops Gading II juga telah ditamatkan secara rasminya pada 31 Disember 2016. Mesyuarat Jawatankuasa Peringkat Tertinggi Tindakan Bersama Pemulihan Cameron Highlands Bil.1/2017 yang dipengerusikan secara bersama oleh mantan Yang Amat Berhormat Timbalan Perdana Menteri dan mantan Yang Amat Berhormat Menteri Besar Pahang pada 7 Mac 2017 telah memutuskan supaya Ops Gading II dilanjutkan menjadi Ops Gading III.

Mesyuarat ini juga telah membuat keputusan untuk memindahkan 13 buah rumah Orang Asli yang menghadapi risiko tanah runtuh di Kampung Sungai Tiang ke kawasan yang lebih selamat. Selain itu, mesyuarat ini juga turut menyokong keputusan Kerajaan Negeri Pahang memberikan lesen pendudukan sementara (TOL) kepada pengusaha haram yang telah lebih 10 tahun mengusahakan tanah yang mempunyai keluasan di bawah lima ekar. Mesyuarat ini bersetuju supaya Jabatan Imigresen Malaysia mengeluarkan pas lawatan kerja sementara kepada pendatang tanpa izin di Cameron Highlands bagi tujuan penggajian semula.

■1440

Mesyuarat tersebut juga turut mencadangkan supaya satu program gotong-royong membersihkan sungai yang melibatkan masyarakat setempat, termasuk pengusaha haram dan juga badan-badan bukan kerajaan (NGO) diadakan di Cameron Highlands. MKN, JPM sekali lagi dilantik sebagai agensi peneraju dalam Ops Gading III dan diarahkan supaya membuka sebuah Pejabat Satelit di Cameron Highlands bagi mewujudkan koordinasi yang lebih berkesan antara agensi.

Tumpuan utama Ops Gading III adalah melakukan pemantauan terhadap pencerobohan semula tanah-tanah yang telah diambil tindakan di samping mengekang pembukaan tanah-tanah baharu. Dalam melaksanakan Ops Gading III ini, MKN, JPM juga

dibantu oleh Pasukan Gerak Udara, Polis Diraja Malaysia (PDRM) bagi melaksanakan pemantauan dari udara.

Mesyuarat turut memutuskan satu sesi *engagement* diadakan secara berterusan dengan penduduk-penduduk kampung, pengusaha tanah dan badan-badan bukan kerajaan (NGO) sepanjang Ops Gading III berlangsung. Semasa Ops Gading III ini juga, Ke Bawah Duli Yang Maha Mulia Pemangku Raja Pahang telah bertitah pada 29 September 2017 supaya Ops Gading ini diteruskan dan satu sub-unit Tentera Darat ditempatkan di Cameron Highlands bagi membantu pemantauan dan penguatkuasaan Ops Gading. Ops Gading III telah tamat secara rasminya pada 31 Disember 2017.

Namun, sebelum itu, Sidang MKN Bil. 9/2017 yang dipengerusikan oleh mantan Yang Amat Berhormat Perdana Menteri pada 28 November 2017 telah membuat keputusan untuk meneruskan Ops Gading ke fasa selanjutnya, iaitu Ops Gading IV juga meyakinkan rakyat bahawa kerajaan amat prihatin terhadap keselamatan penduduk-penduduk di Cameron Highlands.

Lanjutan daripada keputusan Sidang MKN tersebut, mantan Yang Amat Berhormat Timbalan Perdana Menteri bersama-sama mantan Yang Amat Berhormat Menteri Besar Pahang telah mempengerusikan secara bersama Mesyuarat Jawatankuasa Tindakan Bersama Pemulihan Cameron Highlands Bil.1/2018 di Putrajaya pada 11 Januari 2018.

Mesyuarat tersebut juga bersetuju:

- (i) supaya MKN meneruskan peranan sbg agensi peneraju dan menyelaraskan pelaksanaan Ops Gading IV di Cameron Highlands secara bersepadu dengan kerjasama agensi-agensi Kerajaan Persekutuan dan Kerajaan Negeri Pahang;
- (ii) supaya 13 rumah Orang Asli di perkampungan Sungai Tiang tidak perlu dipindahkan dengan syarat projek mitigasi cerun dibuat secara berterusan dan mendatangkan keadaan yang dijamin selamat kepada penduduk;
- (iii) supaya sub-unit Tentera Darat dan sub-unit Pasukan Gerakan Am (PGA) ditempatkan secara berterusan di Cameron Highlands bagi tujuan *show of presence* dan membantu penguatkuasaan terhadap kegiatan penerokaan pencerobohan tanah kerajaan secara haram serta membasmi Pendatang Tanpa Izin dalam Ops Gading IV;

- (iv) supaya pihak Pejabat Daerah dan Tanah Cameron Highlands membuat semakan dan penilaian semula (*review*) terhadap 629 permohonan lesen pendudukan sementara yang telah ditolak;
- (v) supaya Jabatan Pengairan dan Saliran meneruskan dan mempergiatkan lagi program gotong royong pembersihan sungai dan program *engagement* dengan penduduk tempatan, khususnya pengusaha-pengusaha kebun dan NGO;
- (vi) supaya peninggalan sisa aluminium, besi dan kayu daripada struktur rumah plastik yang dimusnahkan ketika Ops Gading I dan Ops Gading II di kawasan Hutan Simpan Kekal dilupus dan dibersihkan dengan segera;
- (vii) menyokong cadangan Ke bawah Duli Yang Maha Mulia Pemangku Raja Pahang supaya tanah kerajaan dan Rizab Melayu di dalam kawasan 5,580 ekar turut dikurniakan kepada bekas-bekas tentera dan polis serta bekas penjawat awam yang pernah berkhidmat dengan Kerajaan Negeri Pahang di Cameron Highlands;
- (viii) supaya Jabatan Mineral Dan Geosains memantau secara berterusan sehingga siap projek mitigasi cerun di Sungai Tiang. Pihak Jabatan Mineral Dan Geosains juga perlu mengambil tindakan segera terhadap cerun-cerun lain yang berisiko tinggi di Cameron Highlands; dan
- (ix) supaya pesawat helikopter ATM dan PDRM turut digunakan dalam membantu operasi tinjauan udara dan operasi bencana alam sekiranya diperlukan.

Sekian, itulah jawapan panjang saya.

**Status Pembersihan Parit Jayus 4, Mukim 18 Sri Medan
Kawasan Parlimen Parit Sulong**

2.45 ptg.

Dato' Dr. Noraini Ahmad [Parit Sulong]: Terima kasih Tuan Yang di-Pertua. Tuan Yang di-Pertua, saya merujuk kepada perkara di atas, saya ingin mengemukakan satu usul berkenaan Perkara Tadbir Kerajaan di bawah Peraturan Mesyuarat 17 kepada Yang Berhormat Menteri Air, Tanah Dan Sumber Asli berkaitan isu status pembersihan Parit Jayus 4, Mukim 18 Sri Medan dalam kawasan Parlimen Parit Sulong. Untuk makluman, pada tahun

2008, Projek Pendalaman Sungai Simpang Kiri iaitu merupakan punca sungai di Parit Jayus telah pun dilaksanakan dengan peruntukan sejumlah RM32,809,095.

Akan tetapi kini, saiz sungai tersebut sehingga pekan Parit Sulong kini kelihatan semakin kecil dan tidak selari dengan pembangunan semasa manakala sungai dari pekan Parit Sulong hingga ke Sri Medan masih tidak ada pelaksanaan pendalaman sungai.

Pada bulan Oktober 2018, saya telah menerima aduan dari penduduk di kawasan Mukim 18 Sri Medan untuk memohon dilakukan pembersihan parit yang telah tersumbat akibat hujan lebat sehingga menyebabkan air melimpah ke kawasan perumahan penduduk. Ekoran daripada itu, saya telah mengemukakan satu surat sokongan kepada pihak Jabatan Pengairan Saliran (JPS) Johor Barat pada 15 Oktober 2018 berserta lampiran beberapa gambar untuk perhatian pihak JPS.

Pada 1 November 2018, pihak JPS telah pun mengeluarkan maklum balas bahawa kerja penggalian telah dijalankan pada tahun 2017 dan parit tersebut akan dimasukkan dalam program kerja 2019 bergantung kepada peruntukan kementerian dan keutamaan. Keadaan menjadi semakin teruk apabila baru-baru ini di kawasan Sri Medan telah mengalami banjir sehingga menyebabkan air sungai melimpah sekali lagi ke dalam kawasan penduduk kampung di sepanjang Parit Jayus 4 sekali gus mengakibatkan banjir.

Ekoran itu, pusat pemindahan banjir sementara telah ditubuhkan pada 13 November 2018 untuk membantu mangsa banjir tersebut dan dilaporkan dan terdapat seramai 16 buah keluarga telah melapor diri. Jadinya, saya ingin mendapatkan penjelasan dari pihak kementerian, sejauh manakah kerja-kerja pembersihan telah dijalankan oleh pihak JPS di sungai ataupun di Parit Jayus 4 ini dan seterusnya apakah pihak kementerian mempunyai perancangan untuk membina tebing di sepanjang kiri dan kanan sungai Simpang Kiri untuk menahan limpahan air masuk ke dalam kawasan kampung.

Akhir sekali, adakah pihak kementerian bercadang untuk membuat pendalaman sungai di sepanjang sungai Simpang Kiri tersebut. Sekian, terima kasih.

2.37 ptg.

Timbalan Menteri Air, Tanah dan Sumber Asli [Tengku Zulpuri Shah bin Raja Puji]: Terima kasih Yang Berhormat Parit Sulong. *Bismillahir Rahmanir Rahim, Assalamualaikum warahmatullahi wabarakatuh.* Tuan Yang di-Pertua, Parit Jayus 4, Mukim 18 Seri Medan merupakan sebahagian daripada kawasan saliran (*drainage area*) Projek Johor Barat yang telah siap dilaksanakan pada tahun 2000. Kawasan Saliran Projek Johor Barat

meliputi kawasan seluas 24,000 hektar (240 kilometer persegi) dengan infrastruktur parit pertanian (*agriculture drainage*) sepanjang 400 kilometer, jalan ladang (*farm road*) sepanjang 215 kilometer, struktur kawalan saliran (*drainage control structure*) sejumlah 45 buah dan Lintasan Jambatan Sederhana (*medium traffic bridge*) sejumlah 64 buah.

Pada tahun 2008, Kementerian Air, Tanah dan Sumber Asli, Jabatan Pengairan Saliran Negeri Johor (JPS) telah siap melaksanakan kerja-kerja meningkatkan keupayaan luahan sungai dengan menggali dan mendalamkan Sungai Simpang Kiri dengan kos sebanyak RM32 juta. Walau bagaimanapun, kerja tersebut hanya melibatkan sebahagian jajaran Sungai Simpang Kiri sahaja dan tidak melibatkan jajaran di Seri Medan iaitu dari pekan Parit Sulong menuju ke Sungai Batu Pahat, Johor.

■1450

Tengku Zulpuri Shah bin Raja: Tuan Yang di-Pertua, kejadian banjir baru-baru ini di Parit Jayus 4, Mukim 18 Seri Medan adalah disebabkan oleh kejadian hujan yang luar biasa di bahagian hulu kawasan tadahan iaitu di Chaah dan Segamat, di mana aliran air sungai mengalir ke bahagian hilir tadahan iaitu Seri Medan, Batu Pahat. Pada ketika ini, hujan luar biasa itu berjumlah 285 milimeter, yang biasanya hujan di sekitar 200 milimeter sahaja. Maknanya, perbezaan meningkat itu ada, ya. Pada masa yang sama, Sungai Batu Pahat telah mengalami kejadian air pasang besar (*high water tide*). Laut yang tinggi biasanya dalam 2.0 meter ataupun dua meter dan pada banjir ini berlaku, air itu naik sehingga tiga meter. Maknanya ada kenaikan.

Pertembungan senario ini telah menyebabkan aras air di Sungai Simpang Kiri tinggi dan aliran air dari parit pertanian dalam kawasan sekitar menjadi perlahan seterusnya membanjiri kawasan perkampungan. Air larian (*surface runoff*) dari kawasan Seri Medan mengalir ke Sungai Simpang Kiri dan ke Sungai Batu Pahat sebelum mengalir ke laut Selat Melaka.

Pada tahun 2016 dan 2017, Jabatan Pengairan Saliran Negeri (JPS) Johor telah melaksanakan kerja-kerja pembersihan di Jajaran Sungai Simpang Kiri (Seri Medan) dengan jumlah kos berjumlah RM1.37 Juta. Di samping itu, kerja-kerja penyelenggaraan parit-parit pertanian di bawah peruntukan kerajaan negeri di dalam kawasan Seri Medan juga telah dilaksanakan pada tahun 2017 dengan kos keseluruhan sebanyak RM588,630.

Kementerian Air, Tanah Dan Sumber Asli (KATS) dalam usaha mendapatkan peruntukan pembangunan khas iaitu istimewa daripada Kementerian Kewangan bagi menangani masalah banjir di kawasan Parit Sulong khususnya di Seri Medan, Batu Pahat,

Johor. Untuk makluman Yang Berhormat Parit Sulong, secara umumnya saya boleh ceritakan di sini ya, pada asas sahajalah, ya.

Kajian terperinci dan reka bentuk untuk penyelesaian menyeluruh sedang dibuat. Jadi asas-asasnya, tujuh kilometer ban kiri dan kanan akan dibuat. Maknanya 14 kilometer dan sungai yang terbabit akan dikorek lebih kurang dalam 10 kilometer dan juga akan dipasangkan dengan pembentuk kekotak, dengan izin, *box Kullberg*, lebih kurang dalam 20. Satu lagi yang penting ialah iaitu rumah pam, ia akan dibina. Jadi kita masih menunggulah peruntukan khas, insya-Allah SWT, apa pun, rakyat diutamakan. Terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 27 November 2018.

[Kamar Khas ditangguhkan pada pukul 2.54 petang]